

Ўзбекистон Республикаси Президентининг 2020 йил 18 февралдаги "Жамиятда ижтимоий-маънавий муҳитни соғломлаштириш, маҳалла институтини янада қўллаб-қувватлаш ҳамда оила ва хотин-қизлар билан ишлаш тизимини янги даражага олиб чиқиш чора-тадбирлари тўғрисида" ПФ-5938-сон фармонида "Мамлакатда «обод ва хавфсиз маҳалла» тамойилига асосланган тизимни самарали жорий этиш" бўйича «Йўл харитаси» қабул қилинган бўлиб, унда оила институтини янада мустаҳкамлаш ва ривожлантириш, **судгача оилавий низоларни олдини олишнинг самарали механизмларини ишлаб чиқиш ва тизим амалиётига татбиқ этиш масалалари** белгиланган.

Ҳуқуқий, фуқаролик, меҳнат, бизнес, оилавий муносабатлардан келиб чиқадиган низоларни судгача ҳал этиш механизми сифатида медиация, яъни махсус воситачи — медиатор иштирокида низолашувчи томонларни яраштириш усуллари ривожланган хорижий давлатлар тажрибасида узоқ йиллардан бери қўлланиб келинади.

Бугунги кунда медиация миллий қонунчиликдан ҳам муносиб ўрин олди. 2018 йил қабул қилинган Ўзбекистон Республикасининг "Медиация тўғрисида"ги қонуни 2019 йилнинг 1 январидан кучга кирди.

Кейинги йилларда оила соҳасида олиб борилаётган тадқиқотлар оилаларнинг мустаҳкамлигига салбий таъсир кўрсатувчи омиллардан бўлган оилавий низоларни ўз вақтида бартараф этиш маҳалла ва оила тизими мутахассисларининг низолар профилактикаси, низолар билан ишлашнинг илғор усуллари ҳамда оилавий ҳаёт мустаҳкамлиги учун зарур бўлган оила медиацияси соҳасида билим ва кўникмаларни ўзлаштирганига боғлиқлигини кўрсатади.

Мазкур иловадан ижтимоий институт сифатида медиациянинг мазмун-моҳияти, медиация тарихи, Ғарб ва Шарқ мамлакатларида медиация институтининг ривожланиши, миллий қонунчиликда медиациянинг ўрни, оилавий низоларни ҳал этишда медиациянинг аҳамияти каби масалалар ўрин олган.